

O Excmo. Concello Pleno, en sesión celebrada o día 28 de setembro de 2023 adoptou o seguinte acordo:

“12.-PROPOSTA DE REALIZACIÓN DOS PREMIOS DE INVESTIGACIÓN “GONZÁLEZ LLANOS”, “INGENIERO COMERMA”, “CONCEPCIÓN ARENAL”, “ANTONIO USERO” E “ÁNGELES ALVARIÑO” NOS ANOS 2023 E 2024, APROBACIÓN DAS BASES QUE REXERÁN OS DITOS PREMIOS E PROCEDER Á SÚA PUBLICACIÓN NO BOP, NA BDNS E NA PÁXINA WEB MUNICIPAL. (EXPEDIENTE CIVIDAS 2023029892). Examinada a proposta que eleva a Concelleira Delegada de Educación, que textualmente di: “A xefatura de servizo de Cultura, Educación, Deportes e Turismo emitiu con data 18.08.2023 a seguinte informe proposta:

“Asunto: Convocatoria e Bases dos Premios de Investigación “González Llanos”, “Ingeniero Comerma”, “Concepción Arenal”, “Antonio Usero” e “Ángeles Alvaríño”.

Antecedentes.-

1º.-No ano 1984 o Concello de Ferrol crea o “Premio de investigación científica Ingeniero Comerma”, consistente no outorgamento de catro premios para traballos de investigación científica e tecnolóxica, manténdose ata o ano 1991 con pequenas variacións no importe, número e características dos premios.

No ano 1998 e co obxecto de colaborar coa Universidade e de contribuir a potenciar as Escolas e Facultades do Campus de Ferrol asínase un convenio coa UDC para a organización dos PREMIOS DE INVESTIGACIÓN “González Llanos”, “Ingeniero Comerma”, “Concepción Arenal” e “Antonio Usero”, renovándose sucesivamente ata o pasado ano 2017.

No ano 2018 ponse de manifesto a necesidade dunha reorganización destes premios, manténdose os ditos premios e incorporando un quinto premio no ámbito das Ciencias denominado Premio de investigación Ángeles Vilaríño, recuperando o Concello todo o relativo á convocatoria e desenvolvemento dos ditos premios de investigación, se ben -por diversas razóns- non se organizaron nos últimos exercicios.

2º Dende o punto de vista xurídico os premios teñen o concepto de subvencións, estando recollido de forma expresa esta categoría, tanto na lexislación estatal (Lei 38/2003 e RD 887/2006) como na lexislación autonómica (Lei 9/2007).

3º Pola súa banda, este Concello dotouse da súa propia Ordenanza de subvencións (BOP 21/10/2019) e dun Plan estratéxico de subvencións para o período 2021-2023 (BOP 24/02/2021).

Cualificación xurídica.-

Como queda indicado, os premios teñen o carácter de subvencións, quedando excluídos unicamente desta categoría aqueles premios que se outorguen sen a previa solicitude do beneficiario (art. 4.a da Lei 38/2003) suposto este que non concorre nos ditos premios de investigación.

A citada lei recolle unha referencia expresa aos premios, no seu carácter de subvención, na súa disposición adicional décima, a cal establece:

“Reglamentariamente establecerase o réximen especial aplicable ao outorgamento dos premios..... que deberá axustarse ao contido deste lei, salvo naqueles aspectos nos que, pola especial natureza das subvencións, non resulte aplicable.”

En todo caso hai que engadir, que o Regulamento que desenvolve a citada lei, non recolleu dito réximen especial, o que obriga a unha aplicación interpretativa da citada disposición adicional décima.

Por outra banda, a disposición adicional décimo cuarta indica que, nas Entidades Locais os procedementos regulados na lei de Subvencións adaptaranse, a través dun regulamento, ás condicións de organización e funcionamento das mesmas.

Dito desenvolvemento regulamentario tampouco se levou a cabo.

En todo caso, o artigo 17 .2 da Lei 38/2003, esixe que:

“Las bases reguladoras de las subvenciones de las corporaciones locales se deberán aprobar en el marco de las bases de ejecución del presupuesto, a través de una ordenanza general de subvenciones o mediante una ordenanza específica para las distintas modalidades de subvenciones.”

A dita norma determina o contido que deberán reflectir as citadas bases, en todo caso, é necesario analizar – nos termos da disposición adicional antes citada- que aspectos dos desenvolvidos no artigo 17 da Lei 38/2003 non son aplicables ao ámbito dos premios.

Neste sentido, as condicións de solvencia (artigo 17.c); a determinación dos libros e rexistros contables (artigo 17.h); o prazo e forma da xustificación (artigo 17.i); as garantías e a súa cancelación (artigo 17.j); pagos anticipados (artigo 17.k) carecen de encaixe algún no desenvolvemento duns premios desta natureza.

Tampouco pode resultar aplicable a composición do xurado determinado pola ordenanza xeral deste concello toda vez que este xurado adoecería dos coñecementos e práctica imprescindible para a emisión de xuízos de valor sobre os traballos das persoas concursantes.

Excluindo dos contidos antes referidos, as bases que se achegan atenden as exixencias do citado precepto.

Competencia.-

O marco competencial xeral das Entidades Locais -constituído polas competencias propias e as competencias delegadas- vén regulado polo art. 25.1 e o art. 7 da Lei 7/85 Reguladora das Bases de Réxime Local.

Este plantexamento xeral ten sido completado a nivel normativo pola Lei 5/2014 ditada polo Parlamento galego, lei que vén a excepciónar a calificación de novas competencias das Entidades Locais o exercicio que teña sido continuado de calquera actividade de fomento desenvolvida durante os exercicios anteriores á entrada en vigor da dita Lei.

Sendo este o contexto normativo, e tal como se indica nos antecedentes do presente informe, esta Administración vén prestando a actividade de fomento que implica os presentes premios dende o ano 1984, polo que nos termos do dito art. 3 da Lei do Parlamento galego 5/2014 o desenvolvemento destes premios non pode ser calificado de nova competencia.

Neste senso, propónse a adopción dos seguintes acordos:

Primeiro.- Aprobar a realización dos Premios de Investigación “González Llanos”, “Ingeniero Comerma”, “Concepción Arenal”, “Antonio Usero” e “Angeles Alvaríño” nos anos 2023 e 2024.

Segundo.- Aprobar as Bases que rexerán os ditos premios que se achegan como anexo a esta proposta e proceder á súa publicación no Boletín Oficial da Provincia, na BDNS e na páxina web municipal”.

Atendendo ó dito informe-proposta, ó informe de Intervención e ó dictame da Comisión informativa de Educación e Universidade, Política Social e Inclusión, Igualdade, Muller, Xuventude, Familia, Infancia e Multiculturalidade e Política Lingüística elévase ó Pleno a adopción dos seguintes acordos:

Primeiro.- Aprobar a realización dos **Premios de Investigación “González Llanos”, “Ingeniero Comerma”, “Concepción Arenal”, “Antonio Usero” e “Angeles Alvariño”** nos anos 2023 e 2024.

Segundo.- Aprobar as Bases que rexerán os ditos premios que se achegan como anexo a esta proposta e proceder á súa publicación no Boletín Oficial da Provincia, na BDNS e na páxina web municipal.

PREMIOS DE INVESTIGACIÓN DO CONCELLO DE FERROL

BASES PARA AS EDICIÓNS DOS ANOS 2023 e 2024.

PRIMEIRA.-OBXECTO E MODALIDADE

Estes premios teñen como finalidade apoiar e impulsar os labores de investigación realizados nalgún dos cinco ámbitos universitarios cos que se relacionan.

Poderanse relacionar xa sexa desde un enfoque estritamente teórico, a partir da análise de experiencias/feitos concretas/os ou como proxectos de futuro, podendo polo tanto ter unha perspectiva histórica, de presente ou como proxección de futuro.

Os premios serán adxudicados a traballos de investigación relacionados e pertencentes aos referidos ámbitos, tal e como a continuación se detalla:

- Premio de investigación Ángeles Alvariño, referido ao ámbito das Ciencias e ás titulacións universitarias que nel se inclúen.
- Premio de investigación González Llanos, referido ao ámbito da Enxeñería e da Arquitectura e ás titulacións universitarias que nel se inclúen.
- Premio de investigación Concepción Arenal, referido ao ámbito das Ciencias Sociais e Xurídicas e ás titulacións universitarias que nel se inclúen.
- Premio de investigación Enxeñeiro Comerma, referido ao ámbito das Artes e das Humanidades e ás titulacións universitarias que nel se inclúen.
- Premio de investigación Antonio Usero, referido ao ámbito das Ciencias da Saúde e ás titulacións universitarias que nel se inclúen.

SEGUNDA.-ORGANIZACIÓN TEMPORAL DOS PREMIOS: ANOS IMPARES E ANOS PARES

A convocatoria dos premios terá carácter bianual:

Nos anos pares **serán convocados os premios de investigación Ángeles Alvariño e González Llanos.**

Nos anos impares **serán convocados os premios de investigación Concepción Arenal, Enxeñeiro Comerma e Antonio Usero.**

- **Anos impares, convocanse os seguintes premios:**

Premio de investigación **Concepción Arenal, referido ao ámbito das Ciencias Sociais e Xurídicas e ás titulacións universitarias que nel se inclúen.**

Premio de investigación **Enxeñeiro Comerma, referido ao ámbito das Artes e das Humanidades e ás titulacións universitarias que nel se inclúen.**

Premio de investigación **Antonio Usero, referido ao ámbito das Ciencias da Saúde e ás titulacións**

universitarias que nel se inclúen.

- Anos pares, convocanse os seguintes premios:

Premio de investigación Ángeles Alvariño, referido ao ámbito das Ciencias e ás titulacións universitarias que nel se inclúen.

Premio de investigación González Llanos, referido ao ámbito da Enxeñería e da Arquitectura e ás titulacións universitarias que nel se inclúen.

TERCEIRA.-ÓRGANO COMPETENTE PARA A ORDENACIÓN E A INSTRUCCIÓN

O impulso, ordenación, instrucción e resolución das cuestións que deriven das presentes bases, corresponderá á concelleira delegada de Educación, Universidade e Política Lingüística. En todo caso, aplicárase de xeito supletorio o establecido na Ordenanza Xeral de Subvencións do Concello de Ferrol.

Corresponderá ao dito órgano, previo os informes que considere necesarios, resolver ou determinar todas aquelas situacións non contempladas nestas bases. Do mesmo xeito, poderá adaptalas a calquera situación de forza maior que puidera xurdir.

CUARTA.-PARTICIPACIÓN

Poderán optar a estes premios e con independencia da súa nacionalidade:

- Persoas de xeito individual: con perfil profesional ou con perfil investigador.
- Equipos ou grupos multiprofesionais que poden estar formados só por profesionais, só por investigadoras/es ou ben por ambos (profesionais e investigadoras/es)

QUINTA.- DOTACIÓN DOS PREMIOS

Cada edición de cada premio estará dotada con 10.000 €/premio.

A esta cantidade aplicaráselle as retencións a que houbese lugar en función da normativa tributaria vixente de acordo coa lei española.

SEXTA.- PROCEDIMENTO DE PARTICIPACIÓN E MODO DE PRESENTACIÓN DOS TRABALLOS

As solicitudes poderán presentarse no prazo de 30 días hábiles contados desde o día seguinte ao da publicación do extracto da convocatoria destes premios no *Boletín Oficial da Provincia da Coruña*, a través do Rexistro Xeral do Concello de Ferrol, na sede electrónica do Concello de Ferrol ou en calquera dos lugares aos que se refire o art. 16.4 da Lei 39/2015 de outubro, de procedemento administrativo común das administracións públicas.

Enderezo postal para os envíos ao Concello Ferrol:

Concellería de Educación, Universidade e Política Lingüística

Pazo Municipal-Praza de Armas, s/n

15402-FERROL

De cada traballo presentaranse:

- Cinco exemplares do traballo completo en soporte dixital, en formato PDF, dun máximo de 100 páxinas e unha versión en soporte informático (CD ou Pen drive) onde o tamaño do arquivo sexa inferior a 5MB (sen datos identificativos de autoría)
- Unha síntese do mesmo de non máis de 4 páxinas en soporte dixital e en formato PDF, con letra Arial 12, interlineado 1'5 en papel Din A-4 (sen datos identificativos de autoría)
- Co fin de preservar o anonimato das/os candidatas/os, os traballos deberán ser presentados baixo o sistema de plica, motivo polo que estes serán enviados xunto cun sobre á parte en cuxo exterior conste:

Premios de Investigación do Concello de Ferrol

Premio ao que concorre

Ano de edición

Título do traballo e ámbito de coñecemento ao que se adscribe

No seu interior e en pechado, incluírá os seguintes datos e documentos:

- Datos persoais do/a autor/a de ser unipersoal ou de todas/as os/as autores/as de ser un equipo/grupo de autoras/es (endereço postal completo, número de teléfono e correo electrónico)
- Fotocopia do/s DNI/NIE
- Curriculum Vitae (da autora ou autor ou dos membros do equipo/grupo)
- Declaración xurada de que o traballo de investigación presentado non foi premiado.
- Para o suposto 2 da Cláusula Cuarta, identificación da persoa que como membro do equipo actuará como interlocutor/a diante do Concello de Ferrol.

Tanto a actuación do xurado como todos os demais aspectos do procedemento esgotarán a vía administrativa.

SÉTIMA.- REQUISITOS DOS TRABALLOS A CONCURRIR AOS PREMIOS

Requisitos dos traballos de investigación para concorrer a estes premios:

- A estrutura dos traballos contemplará polo menos os seguintes apartados: obxectivos, metodoloxía, resultados, aplicabilidade, transferencia, conclusións, xustificación do interese da investigación e fontes bibliográficas e documentais.
- Deberán estar redactados en calquera das linguas que o Estatuto de Autonomía de Galicia sinala como oficiais no territorio desta comunidade autónoma (galego e castelán).
- Deberán ser orixinais e innovadores e non ter obtido con anterioridade ningún outro premio.

Calquera traballo que amose a súa autoría en calquera dos documentos presentados, agás na ficha de solicitude de participación, quedará excluído para a concesión do premio ao que concorra.

OITAVA.-EXCLUSIÓN

O incumprimento de calquera das obrigas recollidas nestas bases, polos participantes, implicará a exclusión dos mesmos en todo o proceso de selección e a devolución por parte do concello, da documentación presentada pola/o candidata/o.

NOVENA.- XURADO

O xurado dos premios estará formado polos seguintes membros:

- O/a alcalde/esa de Ferrol ou a persoa en quen delegue, que como presidente/a terá voto de calidade.
- Un/ha especialista de recoñecido prestixio no ámbito da investigación correspondente proposto polo Concello de Ferrol.
- Tres investigadoras/es universitarias/os nomeados polo Concello de Ferrol e a proposta da Universidade da Coruña e pertencentes ao ámbito de investigación que en cada premio corresponda.
- Un/ha funcionario/a do Concello de Ferrol que actuará como secretario/a, con voz mais sen voto.

Cada premio/edición terá o seu propio xurado en relación co ámbito ao que se refira o premio, agás no caso do/a presidente/a e do/a secretario/a que poderán ser as mesmas persoas.

A composición do xurado será paritaria e darase a coñecer, con anterioridade a súa primeira reunión, no taboleiro e na páxina web do Concello de Ferrol

(www.ferrol.gal/premiosdeinvestigacionconcellodeferrol), co fin de que se poidan interpoñer, no seu caso, os recursos legais pertinentes.

A proposta do xurado publicarase no último trimestre do ano de cada edición dos premios na páxina web do Concello de Ferrol (www.ferrol.gal/premiosdeinvestigacionconcellodeferrol)

O xurado recibirá de máns do/a funcionario/a do Concello de Ferrol encargado/a de recepcionar os traballos presentados, referidos na BASE SEXTA, apartados a) e b) SEN DATOS IDENTIFICATIVOS DE

AUTORÍA, baixo un código automático de recepción que o represente.

O xurado actuará en pleno e será necesaria a asistencia da maioría simple dos seus membros. Para os efectos da validez da súa constitución aplicarase o disposto no art. 17 Lei 40/2015, de 1 de outubro, de réxime xurídico do sector público.

O xurado presentaralle a súa proposta ao/á Alcalde/esa-Presidente/a da Corporación Municipal de Ferrol, que é o órgano competente para conceder estes premios.

DÉCIMA.- CRITERIOS DE VALORACIÓN DOS TRABALLOS

O xurado designado para a valoración e a selección dos traballos presentados valorará estes tendo en conta:

-A calidade e o rigor científico: 45%

-Innovación, interese, contribución ao coñecemento do patrimonio cultural ou aplicabilidade dos traballos: 45%

-A libre criterio do xurado e por decisión da maioría dos seus membros: 10%

En todo caso a aplicación deste criterio quedará suxeita ás singularidades que poida reflectir o traballo, esixíndose a debida fundamentación e motivación de dita singularidade, a cal quedará reflectida de xeito expreso na resolución pola que leve a cabo a adxudicación do Premio.

O xurado poderá acordar a concesión dun premio *ex aequo* e no dito caso o importe do mesmo dividiríase entre as/os participantes premiados (individuos ou grupos) En todo caso, calquera premio poderá ser declarado deserto, sempre e cando o xurado considere que os traballos de investigación presentados non acaden os requisitos esixidos ou os niveis suficientes. As decisións do Xurado son inapelables.

Os traballos presentados non serán devoltos. Posteriormente e no mesmo ano de cada convocatoria, os traballos non premiados serán destruídos.

DÉCIMO PRIMEIRA -COMPATIBILIDADE DOS PREMIOS

Os presentes premios son compatibles con calquera outro premio que puideran recibir as persoas premiadas en concursos distintos a este.

DÉCIMO SEGUNDA.- COÑECEMENTO E ACEPTACIÓN DAS BASES

O feito de se presentar a calquera destes premios supón a aceptación das presentes bases e que se cumpren os requisitos mencionados.

DÉCIMO TERCEIRA.- RÉXIME XURÍDICO

Atendendo á natureza xurídica, en todo o non previsto nas presentes bases será de aplicación a normativa estatal e autonómica en materia de subvencións, (Lei 38/2003 e RD 887/2006 e Lei 9/2007) así como a Ordenanza de Subvencións do Concello de Ferrol (BOP 21-10-2019).

DÉCIMO CUARTA.- OBRIGAS DAS E DOS CONCURSANTES PREMIADAS/OS

Tódolos galardoados teñen a obriga de recoller os seus premios persoalmente en Ferrol e de impartir unha conferencia na propia cidade, sobre o tema obxecto do premio, na data acordada entre as partes (Concello de Ferrol e persoa ou grupo premiado).

Os premios serán entregados no Pazo Municipal do Concello de Ferrol e as conferencias a cargo das persoas galardoadas poderán ser impartidas nas dependencias do Campus Universitario de Ferrol-UDC.

Para a cobranza dos premios os/as gañadores/as deberán presentar a seguinte documentación:

- Certificación de estar ao corrente no cumprimento das obrigas coa Seguridade Social e coa Administración tributaria (estatal e autonómica).

- Autorización ao Concello de Ferrol para que comprobe a través da súa sede electrónica que non ten débedas con esta entidade.

- Declaración, baixo a súa responsabilidade, que cumpre cos requisitos establecidos na normativa vixente para a obtención do Premio de investigación no que participe, comprometéndose a manter o cumprimento ata o pagamento do premio.

DÉCIMO QUINTA.- PROMOCIÓN E PARTICIPACIÓN DESDE O SISTEMA UNIVERSITARIO GALEGO

Promoverase a máxima participación das universidades do Sistema Universitario Público Galego, para a difusión e participación nestes premios, entre o seu persoal docente e investigador.

DÉCIMO SEXTA.-PROTECCIÓN DE DATOS

Os datos de carácter persoal que as persoas concursantes envíen, quedarán incorporados a un ficheiro propiedade da organización e serán empregados, unicamente con fins propios da actividade da mesma. Conforme á LOPD, poderanse exercer os dereitos de acceso, rectificación, cancelación e oposición a través do Rexistro Xeral do Concello de Ferrol.

DÉCIMO SÉTIMA.-DIFUSIÓN E PUBLICACIÓN DAS CONVOCATORIAS

Pola súa parte, a convocatoria publicarase na Base Nacional de Subvencións.

As presentes bases publicaranse no Boletín Oficial da Provincia da Coruña.

Sen prexuízo da publicación das persoas premiadas na Base Nacional de Subvencións, publicaranse na Web do Concello de Ferrol, tanto as persoas e traballos premiados coma aqueles presentados e non premiados.

DÉCIMO OITAVA.- PUBLICACIÓN/EDICIÓN DOS TRABALLOS PREMIADOS:

Os traballos de investigación premiados poderán ser editados e publicados como publicación de carácter non venal polo Concello de Ferrol en soporte papel, en soporte dixital ou en ambos e a/s persoa/s ou grupo/s candidatos/as aos premios adquirirán de antemán o compromiso de adaptar a documentación presentada para o premio ao formato a editar, sen esixir este/s outras contraprestacións por parte do Concello de Ferrol que non sexa a propiedade intelectual á que teñen dereito e á entrega do 10% de exemplares sempre que se edite en soporte papel (libro) ou en soporte dixital (CD).

Previa deliberación a Corporación, en votación ordinaria e por maioría de dezanove votos a favor correspondentes ós sres/as membros dos grupos municipais do Partido Popular e Partido Socialista, e catro abstencións correspondentes ós sres/as membros dos grupos municipais do Bloque Nacionalista Galego e de Ferrol en Común”.

Pazo Municipal, na data que figura na sinatura electrónica.

Cúmprase.-

O ALCALDE.-

Pase á U. Administrativa correspondente.-

O SECRETARIO XERAL.-

Firmado por : SEUDONIMO - ALCALDE - CONCELLO DE FERROL Fecha : 29/09/2023
Cargo : Alcalde

Firmado por : LEOPOLDO TOMAS MOURE GARCIA -
Cargo : Secretario Xeral
Este documento foi asinado electrónicamente conforme á lei 59/2003 de 19 de decembro, de sinatura electrónica.